

HAROLD L. GEERMAN

Naci 12 di September 1959 · For di San Juan, Puerto Rico

KEN

Despues di a caba scol basico na Savaneta y Pos Chikito, mi a sigui mi MAVO na St. Antonius College na Santa Cruz, unda e cabezante, Zuster Cecilia tabata masha involvi pa motiva cada un di nos pa bay dilanti. Mi tabatin intencion di dreña scol di polis despues di MAVO, pero tabata Zuster Cecilia cu a bisa e polisnan pa laga mi na paz.

Mi a bay Colegio Arubano despues, den HAVO 4 enbez di E klas, debi na mi vak extra di Biologie. Biologie y Scheikunde semper tabata mi favoritonan, y mirando e posibilidadnan grandi di trabou cu Lago tabata ofrece, mi a scohe Scheikunde tambe pa sigui studia, despues di caba Colegio na 1979.

Mi a studia 'Chemistry' na Biscayne College, Miami, cu un 'post graduate' na FIT, Melbourne (Florida) den Chemical Engineering. Durante e periodo di estudio aki mi a conoce Liliebeth Santana, un estudiante di Puerto Rico cu ken mi a casa despues. Nos tin un yui muhe Kimberley, di 17 aña cu apesar di ta biba na Puerto Rico, ta papia Papiamentu regularmente. Nos ta biaha por lo menos un bez pa aña pa bishita famia na Aruba y mi famia di Aruba tambe ta bin Puerto Rico regularmente.

TRABOU

Mi prome trabou tabata como Quimico na Ortho Pharmaceutical Inc, na Manati, Puerto Rico. Ortho Pharmaceuticals y Ortho Biologics ta parti di e famia di companianan Johnson & Johnson. Aki mi a traha cu y riba productonan conoci manera: Monistat Cream; Monistat Derm; Contraceptives, Ortho-Novum; Retin-A, creams & gels.

Durante mi periodo na Ortho, mi team cu mi a diseña e sistema robotico pa cura pa un produccion constante, y asina segura cu e productonan aki tabata mas lihe posibel den farmacia rond mundo, specialmente na Merca. Mi responsabilidadnan na Ortho ademas tabata inclui den produccion, empaketamento y almacenamento di e productonan farmacutico aki.

Tabata durante e periodo aki, cu a bin un crisis cu Retin-A. Ortho tabata produci



un lote di Retin-A pa luna pa satisfice e demanda di mercado. Nos mester a traha den 'overdrive,' despues cu un articulo den un revista medico a muestra cu e producto tabata uno magico, ya cu e tabata elimina rimpel di cara. Esaki ta berdad, pasobra e ingrediente principal di Retin-A ta un acido cu ta promove e proceso di eliminacion di celulanen morto. Trahando cu Ortho, mi a haya e encargo na e prome planta Biotecnologico pa implementa y qualifica e Laboratorio Bioquimico y Microbiologico. Mi mester a percura cu e laboratorionan tabata cumpli cu rekesitonan di FDA, esta Food & Drug Agency. Un producto cu nos tabata traha riba dje ta EPO, cu a haya mal nomber den deporte, pero cu ta necesario pa esnan cu mester di celulanen cora mas lihe posibel. Mi carrera a hibami tambe pa traha cu Raytheon Catalytic Company y supervisa e construccion y implementacion di un planta optamologico pa Alcon.

Ya pa 7 aña mi ta encabeza e seccion di Business Development pa Day & Zimmerman, un compania farmacutico di 107 aña, basa na Philadelphia. D&Z por ehempel tabata elemental den yuda Schering-Plough, manufacturadonan di 'Claritin,' sali di su problemanan cu FDA, y a caba di traha un planta pa Janssen di Johnson & Johnson na Puerto Rico. D&Z ta asisti companianan grandi manera Abbott, Merck, Boston Scientific, St. Jude Medical, Astra Zeneca, Bristol Myers Squibb, Pfizer y otro.

Den e comunidad di PR y e industria, tur hende sa cu ami ta un stranhero y practicamente tur hende den e industria sa cu

mi fam ta di Aruba. Den e compania di D&Z hopi di nan conoce mi como 'Reuben Sandwich.' Nan a traduci Arubian pa Reuben, e ta zona mas o menos igual. E industria farmacutico ta hopi competitivo, pero mi idiomanan ta yudami masha hopi mes.

LO CONSIDERA UN CARERA NA ARUBA?

Na 1984, mi a sinti hopi malo y e decision di bin pa Puerto Rico tabata algo masha duro mes, ya cu esey no tabata e idea. Despues di a caba di studia, Lago a anuncia su ciere y no tabatin trabou pa mi na Aruba. Despues cu e tempo a pasa mi a comprende cu mi destino tabata na Puerto Rico. Mi ta haciendo mi bida na Puerto Rico, pero sin perde mi identidad di Arubiano. Mi auto tin un numer plaat di Aruba y mi accent no ta di Puerto Rico. Mi no por vota, ya cu mi ta prefera pa keda cu mi paspoort Hulandes.

Awor, cu e experiencia cu mi tin awendia, mi ta kere cu mi por trece hopi cos bon pa Aruba, pero mi no a haci nada pa busca trabou. Si tin oportunidad, mi lo evalua y tuma un decision.

PERSPECTIVA PA ARUBA

Aruba mester cuminsa traha duro riba e movimiento "green", pasobra Aruba tin solo y biento. Tambe na Aruba tin e posibilidad di produci 'biodiesel' y converti e motor di autonan pa core cu e fuel ey. Esey lo yuda combati e prijsnan caro di e gasolin y di luz y awa. Aruba tambe tin un mezcla de stranhero y si por controla e entrada di nan pa apoya di hiba Aruba pa dilanti, mi no tin problema.

E industria di Aloe, ta e mihor carta cu Aruba tin, pasobra hopi di e medicinan lo bira "natural", pasobra e industria di Pharmaceuticals ta cambiando para Biologics, y Biologics ta un industria cu ta copiando e remedinan natural. Hopi di hendenan di antes, tin concimiento di hopi mata di Aruba cu tin efectonan di cura enfermedadnan. Lamentablemente a perde hopi di e conocimiento aki pasobra ta mas facil bebe un pildo y busca y den bo hofi y mezcle y bebe algo cu porta no tin un bon smaak. 